

Dithero tsa Tirelano mo Kutlwanong

Thero ka Sontaga o o latolang o o latolang wa bofelo morago ga moletlo wa Borarobongwe, e le ka 06.

11. 2011 54/2011

Mo leineng la Modimo o e leng Rara le Morwa le Mowa o o Boitshepo!

1. Sefela sa 315 -290/296
2. Thapelo: *Modimo Rara yo o mo legodimong, re a leboga, gonne le mo bofelong jwa ngwaga wa kereke o sa ntse o re tsoseletsa ka Lefoko la gago. Ke gona re go kopang gore o foufolole matlho a rona gore re bone ka Lefoko la thero a kajeno gore Satane o leka ka thata ya gagwe go kgaoganya batho le Morwao Jesu Keresete Morena le Mopholosi wa rona. Gape o kabolole ditsebe tsa rona gore re utlwe ka Lefoko la gago gore Morwao Jesu Keresete ke ene yo o re gololang mo ditsietsing tsa ga Satane gore tiro ya kereke ya gago e tsweledisiwe le mo bofelong jwa ngwaga wa kereke le mo bofelong jwa lefatshe ka monwana wa gago go golola batho mo thateng le mo ditsietsing tsa ga Satane ka Lefoko le disakaramente tsa gagwe, go ya a bowe mo kgalalelong ya gagwe go atlhola batshedi le baswi. O re utlwa ka ntlha ya Morwao Jesu Keresete, Morena wa rona. Amen.*
3. Epistolo ka fa thulaganyong ya 2 e kwadilwe mo go Baroma 14:7-9;
4. Efangele ka fa thulaganyong ya 1 e kwadilwe mo go Johane Luka 17:20-30.
5. A go ipolelwe tumelo ya bokeresete!
6. Sefela sa 302 - 277/296
7. Thapelo ya mmadi wa thero.
8. Efangele ka fa thulaganyong ya 3 e kwadilwe mo go
9. Luka 11:14-23, e re: *"Jesu a ba a kgaramelelsa modemone ntle, ya bo e le o o semumu. Ya re modemone o sena go tswa, motho yo o semumu a bua; mme bontsi jwa batho jwa gakgamala. Foo bangwe ba bone ba re: 'O kgaramelelsa medemone ntle ka Beelsebule, morena wa medemone.' Ba bangwe ba mo leka, ba batla mo go ene sesupo se se tswang kwa legodimong. Mme ene, ka a itse megopolo ya bone, a ba raya a re: 'Bogosi bongwe le bongwe jo bo ikgaogantseng bo a senyega, mme ntlo e e itwantshang e a wa. Fa Satane le ene a ikgaogantse le ba gagwe, bogosi jwa gagwe bo ka ema jang? Gonne lo a re, ke kgaramelelsa medemone ntle ka Beelsebule. Jaanong fa nna ke kgaramelelsa medemone ntle ka Beelsebule, bomorwaa-lona ba e kgaramelelsa ntle ka mang? Ka moo bone ba tla nna baatlhodi ba lona. Mme fa ke kgaramelelsa medemone ntle ka monwana wa Modimo, gona puso ya Modimo e fitlhile mo go lona. E a re fa monna yo o senatla, yo o tlhometseng, a disitse lapa la gagwe, tse a nang natso di nne mo kagisong. Mme fa mongwe yo o*

senatla bogolo go ene a mo tllhasela, a mo fenya, o mo tseela dibolai tsa gagwe tse a di ikantseng, a abe dithopo tsa gagwe. Yo o sa ntweleng, o a ntwantsha; yo o sa phutheng le nna, o a falatsa."
Amen.

Thero: Barategi mo Moreneng wa rona Jesu Keresete, ka metlha Morena Jesu Keresete o rata go re biletsa mo kitsong gore re gopole bogolo jwa go dumela mo go ene. Ke gona o re gopotsang le mo bofelong jwa ngwaga wa kereke ka Lefoko la thero ya kajeno, fa mongwe le mongwe yo o sa mo lwelang a mo lwantsha; fa mongwe le mongwe yo o sa phutheng le ene, a falatsa letsomane la dinku tsa gagwe. A mongwe le mongwe a itlhotlhomise mo nakong eno ka gore a o lwela tsa puso ya Modimo, gongwe o emelana le yona; a o phutha tse di latlhegileng mmogo le Keresete, gongwe o phatlalatsa badumedi gore ba se ka ba tlhola ba sala Keresete morago, mme ba boele mo sereng sa gagwe, se e leng Satane?

Ka moo Morena Jesu Keresete ka Lefoko la thero ya kajeno o rata go fofolola matlho a rona gore re bone kotsi le thaelo e kgolo e e leng teng ka thata le ditsietso tse dintsi tsa ga Satane; gape o rata go kabolola ditsebe tsa rona gore re utlwe, fa Jesu a le teng go re thusa le go re golola rotlhe mo thateng le mo ditsietsong tsa ga Satane gore re nne ba puso ya Modimo, re ngaparele mo go Jesu, re mo sale morago ka metlha. Ke tsona tse pedi ka bokhutshwane tse Lefoko la thero ya kajeno le re bolelelang.

A re tlhokomeleng go bona ka fa Satane a lehang go kgaoganya batho le Jesu ka teng. Jesu o thusa batho, o ba fodisa ka monwana wa Modimo, ka lorato lo logolo, ka thuso e e leng thuso tota. Go na le ba ba amogelang thuso ya gagwe ka tumelo, mme mo go ba bangwe matlho a fofadiwa gore ba se ka ba bona, fa e le thuso, le phodiso, le kgololo tota, mme ba tsiediwe ka maaka a magolo, a e leng maungo a sera le mmaba, le a tsietso e kgolo ya ga Satane, ba gogelwe mo timetsong e e maswe, ba gopole, fa tse di molemo tse di dirwang ke Jesu, Mothusi le Mopholosi wa nnete ka thata ya Motlhodi wa batho e le ditiro tse di dirilwang ka thata ya ga Beelsebule, morena wa mewa e e bosula. Fela jalo re bona gantsi, gore batho ba tsiediwa ke Satane go gopola, fa tse di dirwang ka mekgwa le melawana e e ganetsang thato ya Modimo e le tse di siameng, tse di thusang batho tota. Ba le bantsi ba faposiwa mo tseleng e e tshesane e e yang mo botshelong jo bo sa khutleng, mo tseleng e re e baakanyeditsweng ke Morena Jesu Keresete gore re bone boitshwarelo jwa maleo a rona ka go kolobediwa mo leineng la Modimo o o Borarobongwe, ka go itshwarelwa mo leineng la ona, le ka go ja mmele wa ga Keresete, le go nwa madi a gagwe a a tshologileng go nna boitshwarelo jwa dibe, ba faposiwa mo tseleng eo go latela mefutafuta ya tse di okediwang ka menatenate e e latlhwang ke Modimo, le fa e natefela dipelo tsa ba bantsi. A re se ka ra lebala ka gope, fa Satane a sa ntse a kgarakgatshega jaaka tau e e dumang, a batla yo a ka mo metsang gore re itise, re emelane nae ka go tlhomama mo tumelong,

E e leng tumelo go dumela gore tota-tota Jesu o ne a sa dire ka thata ya yo o bosula, ya morena wa mewa e e bosula, mme o dira ditiro tsotlhe tsa gagwe, e le Morwa Modimo yo o tsetsweng a le esi, yo o fologileng mo legodimong ka lorato lwa ga Rraagwe, Modimo wa nnete Motlhodi wa batho botlhe go baakanyetsa batho botlhe ba merafe yotlhe ba dipaka tsotlhe pholoso ya botshelo jo bo sa khutleng, Jesu e le ene Modimo ruri yo o tsetsweng ke Rara ka bosenatshimologo, le motho ruri yo o tsetsweng ke Maria wa lekgarebe ka thata ya Mowa o o Boitshepo, e le ene yo o tsamaileng mo lefatsheng go thusa batho ba le bantsi ka go ba fodisa, le go ba ruta le go tlhalosa molao wa Modimo gore batho ba itemoge, ba gogelwe mo boikwatlhaong, le mo boitshwarelong, mo pholosong le botshelong mo leineng la gagwe gore ba gololwe mo maleong, le mo losong, le mo thateng le mo ditsietsong tsotlhe tsa ga Satane, ba rekololwe mo go tsona, e seng ka gouta, gongwe ka selefera, mme e le ka go boga le go swa ga gagwe a se na molato, gore re nne ba gagwe, re tshele pusong ya Modimo jaaka ene yo o tsogileng mo baswing, a tshela, a busa ka bosenabokhutlo. Ke lona lorato lo logolo lwa ga Jesu gore a se ka a lapa go re kaela, le go re ruta, le go re tlhotlheletsa ka metlha ka Lefoko la gagwe ka go re laletsa gore re tshele mo kolobetsong ya rona, re ikanye boitshwarelo jwa maleo a rona, re tiisiwe mo tumelong ya rona ka go amogela mmele wa gagwe, le madi a gagwe mo selalelong sa gagwe. Kwa batho ba amogelang taletso ya gagwe teng, ba foufololwa matlho a bone, le go kabololwa ditsebe tsa bone, dipelo tsa bone di phefadiwe gore ba se ka ba belaela ka tse re di diretsweng, le go baakanyediwa ke Keresete, re tla dumela, le go ikanya, fa Jesu e le seganka sa Modimo tota se se romilweng go bofa, le go fenya Satane, mmaba wa botshelo le pholoso yotlhe, e le seganka se se dirang tsotlhe ka monwana wa Modimo, se se tla fenyetsang le baleofi go fenya dikeletso tse di bosula tsa bone, gore ba tswellele sentle mo tseleng ya tumelo.

Ka jalo Morena Jesu o re kaela ka Lefoko la gagwe ka metlha gore re se tsiediwe ke Satane ka tse di kaiwang menatenate ya ditsietso tsa gagwe ke batho, mme ba tiie, ba tlhomame mo tumelong ya nnete gore ba tswellele mo tseleng e e tshesane, go ya ba goroge mo botshelong jo bo sa khutleng mo kgalalelong ya ga Jesu Keresete, Morena le Mopholosi wa rona. Amen.

10. Thapelo: *Morena wa rona Jesu Keresete, re go leboga mo nakong eno. O itshenoletse mo badumeding ba gago ka go kgarameleletsa medemone ntle, wa itshenolela gore o fentse Satane, o sentse puso ya gagwe ya lefifi, o re tliseditse puso ya lesedi la gago. Re kopa mo go wena gore o ntshe mo dipelong tsa rona tsotlhe tse di ka thibang Lefoko la gago. O re thuse gore re le amogele. Morena, o re thuse ka bopelotlhomogi jwa gago, o amogele thapelo ya rona, o re tshegofaletse Lefoko le re le utlwileng kajeno. Amen.*

11. Thapelo ya Morena: Rara wa rona yo o mo legodimong ...

12. Sefela sa 303 - 278/285

13. A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber, ka ngwaga wa 2011

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.